

佛說大乘四法經

唐中天竺三藏地婆訶羅奉勅初譯

如是我聞一時薄伽梵在室羅筏住誓多林
 給孤獨園與大苾芻眾千二百五十人俱復
 有無量菩薩摩訶薩眾爾時世尊告諸苾芻
 有四種法菩薩摩訶薩盡其壽量常應修行
 乃至雖遇喪命因緣亦不得捨何者為四諸
 苾芻菩薩盡壽乃至逢遇喪命因緣必定不
 得捨菩提心諸苾芻菩薩盡壽乃至逢遇喪
 命因緣必定不得捨善知識諸苾芻菩薩盡
 壽乃至逢遇喪命因緣不得棄捨堪忍愛樂
 諸苾芻菩薩盡壽乃至逢遇喪命因緣必定
 不得捨阿練若諸苾芻如是四法菩薩盡壽
 常應堅持寧喪身命而不棄捨爾時世尊重
 演其義說伽他曰

世間明慧者 應發菩提心 常思一切智
 恒近善知識 住堪忍愛樂 依止阿練若
 猶如師子王 遠離諸驚怖
 諸明慧者修行此法速能超出眾魔羅網疾
 證無上正等菩提時薄伽梵說此經已諸苾
 芻等歡喜奉行

佛說大乘四法經